

## Morning Dogri (NSD) National News Bulletin 03-06-2024

### आकाशवाणी

- लोकसभा चुनाव दे सब्बै 7 गेड़ें लेई वोटें दी गिनतरी कल बडलै 8 बजे थमां शुरू होग।
- यूपीआई लैन-देन नै नया रिकार्ड बनाया, मई च 14.04 बिलियन दा लैने-देन कीता गेआ।
- मौसम विभाग नै पेशगोई कीती ऐ जे अगले दऊं दिनें च पच्छम-उत्तर, मध्य ते पूर्वी भारत च बड़ी मती गर्मी थमां किश राहत थहोग।
- कश्मीर घाटी दे पुलवामा जिले दे नेहाया इलाके च सुरक्षाबलें ते आतंकिएं बश्कार टाकरा जारी ऐ।
- भारी बरखें करी श्रीलंका च व्यापक तबाही होई ऐ।

<><><><><><>

### Conuting

लोकसभा चुनाव 2024 दे वोटें दी गिनतरी कल होग। एहदे इलावा कल गै आंध्रप्रदेश ते ओडिशा च होए दे विधानसभा चुनाव ते किश होर विधानसभाएं दे उप-चुनाएं दे दे वोटें दी गिनतरी बी कीती जाग। वोटें दी गिनतरी दा कम्म बडलै 8 बजे शुरू होग ते एहदे रुझान ते नतीजे कन्नो-कन्नी चुनाव आयोग दी वेबसाइट पर [results.eci.gov.in](https://results.eci.gov.in) दे इलावा वोटर हैल्पलाइन ऐप पर बी उपलब्ध होंगन। वोटर हैल्पलाइन ऐपग ी गूगल प्ले स्टोर जां ऐपल प्ले स्टोर परा बी डाउनलोड कीता जाई सकदा ऐ। आयोग नै रिटर्निंग अफसरें ते काउंटिंग एजटें लेइ इक बुकलेट बी जारी कीती ऐ जेहड़ी इस्सै वेबसाइट पर उपलब्ध ऐ। आयोग नै दस्सेआ ऐ जे वोटें दी गिनतरी दे प्रवधन, प्रक्रिया, ईवीएम ते वीवीपीएटी दे रखरखाव लेई लोडचदे निर्देश नियमें बगैरा बी वेबसाइट पर उपलब्ध रखे दा ऐ।

<><><><><><>

## BJP-Arunachal Pradesh

बीजेपी अरुणाचल प्रदेश च परतिये सरकार बनाग। जिसलै कि सिक्किम क्रांतिकारी मोर्चा सिक्किम च अपनी सरकार खडेरग। दऊं पूर्वोत्तर राज्ये दे विधानसभा चुनाएं दे वोटें दी गिनतरी आला कम्म कल होग। अरुणाचल प्रदेश दी 60 सीटें ते सिक्किम दी 32 विधानसभा सीटें लेई 19 अप्रैल गी लोकसभा चुनां दे कन्नै होए हे। बीजेपी नै अरुणाचल प्रदेश च शानदार जित्त दर्ज कीती ऐ। बीजेपी दे 60 चा 46 सीटां हासल कीतियां न। सिक्किम च कुल 32 सीटें दे नतीजे घोषत होई गेदे न। 31 सीटां सिक्किम क्रांतिकारी मोर्चा नै हासल कीतियां। सिक्किम डैमोक्रेटिक फ्रंट गी इक सीट हासल होई। निवर्तमान मुख्यमंत्री ते एसकेएम प्रधान प्रेम सिंह तमांग होरें दो सीटें पर चुनां लड़ेआ ते दौनें पर जित्त हासल कीती।



## PM-Arunachal Pradesh

प्रधानमंत्री नरेन्द्र मोदी होरें विकास दी राजनीति गी स्पष्ट जनादेश देने आले अरुणाचल प्रदेश दे लोकें दा आभार जाहर कीता ऐ। प्रधानमंत्री होरें राज्य च इक बारी परतिये बीजेपी च विश्वास जाहर करने आस्तै लोकें दा धन्नबाद कीता ऐ। इक सोशल मीडिया पोस्ट च मोदी होरें आखेआ जे उंदी पार्टी राज्य दे विकास आस्तै पूरे उत्साह कन्नै कम्म करोग।



## PM-Sikkim

प्रधानमंत्री नरेन्द्र मोदी होरें सिक्किम क्रांतिकारी मोर्चा ते सिक्किम दे मुख्यमंत्री प्रेम सिंह तमांग होरें गी विधानसभा चुनां जित्तने पर बधाई दित्ती ऐ। सोशल मीडिया पोस्ट च बी मोदी होरें आखेआ जे ओ सिक्किम दी तरक्की खुशहाली गी अगगै बधाने लेई राज्य सरकार कन्नै रलियै कम्म करने लेई इच्छुक न।



## West Bengal

पच्छम बंगाल च 17 बारासात ते 20 मथुरापुर संसदीय इलाकें दे दऊं मतदान केन्द्रें पर अज्ज परतियै वोट पाए जा करदे न। मतदान बडलै 7 बजे थमां शुरु होई चुके दा ऐ ते संजा 6 बजे तगर बारी रौहग। इनें दो निर्वाचन हल्के च पैहली जून गी लोकसभा चुनां 2024 दे 7में गेड़ तैह्त मतदान गेआ हा। सरबंधत निर्वाचन हल्के च बारासात पीसी तैह्त 61 कदसबागची, सरदार पाडा एफपी स्कूल कमरा नंबर 2 ते मथुरापुर संसदीय क्षेत्र तैह्त 26 आददीर महल श्री चैतनया विद्यापीठ पीपी स्कूल।



## UPI

भारत दी मशहूर भुगतान प्रणाली यूनिफाइड पेमेंट इंटरफेस यूपीआई नै लैन-देन च मई म्हीने च 20.45 ट्रिलियन रपे दे 14.04 बिलियन लैन-देन दा नमां रिकार्ड स्थापत कीता। नैशनल पेमेंटस कारपोरेशन ऑफ इंडिया आस्सेआ सांझे कीते गेदे आंकड़े च आखेआ गेआ ऐ जे एह मई 2023 दे मकाबले 49 प्रतिशत ते मूलें च 39 प्रतिशत बद्ध न। अप्रैल 2016 च यूपीआई शुरु होने परैत मई दे मजूदा आंकड़े मुल ते मिकदार साब्वै सब्बने शा बद्ध न।



## IMD

मौसम विभाग नै अगले 2 दिनें च पच्छम-उत्तर, मध्य ते पूर्वी भारत च बड़ी मती गर्मी च कमी औने दी मेद जाहर कीती ऐ। मौसम विभाग नै आखेआ ऐ जे हिचाल प्रदेश, राजस्थान, मध्यप्रदेश ते छत्तीसगढ़ दे किश हिस्सें च कल तगर बड़ी मती गर्मी दी स्थिति बनी दी रौहग। गर्मी दी स्थिति इस म्हीने दी 4 तरीक तगर जम्मू कश्मीर, लद्दाख, पंजाब, हरियाणा, चंडीगढ़, दिल्ली, उत्तर प्रदेश ते ओडिशा च बी बनी दी रौहग। मौसम विभाग नै मुख दे बाकी हिस्सें च बद्धोबद्ध तापमान च कोई बड्डा बदलाव नेई औने दी मेद जाहर कीती ऐ। मौसम विभाग नै अगले 7 दिनें दरान बिजली गरजने ते तेज हवाएं कन्नै पच्छम बंगाल ते पूर्वोत्तर भारत च हल्की थमां दरमेयानी दर्जे दी बरखा पाने दी मेद जाहर कीती ऐ।



## PM-Heat Wave

प्रधानमंत्री नरेन्द्र मोदी होरें कल दिल्ली च बड़ी मती गर्मी ते चक्रवात परेंत दे हालात सनें नेकें विशें दी समीक्षा करने लेई केई बैठकें दी प्रधानता कीती। चक्रवात रेमल मगरा स्थिति दा जायजा लैने ताई लग्गी दी बैठक च प्रधानमंत्री होरें गी प्रभावत राज्य पर चक्रवात दे असर बारे जानकारी दित्ती गई। मिजोरम, असम, मणिपुर, मेघालय ते त्रिपुरा च ल्हास पस्सियां पौने ते आए दे हाडें करियै लोकें दी जन जाने ते घरें ते होए दे होर दुए नुक्सान पर बी गल्लबात कीती गई।



## JK Encounter

दक्खनी कश्मीर दे पुलवामा जिले दे नेहाया इलाकें च हुनै शा किश चिर पैहले सुरक्षाबलें ते आतंकिएं बश्कार टाकरा भखी पेआ ऐ। पुलसै मूजब इलाके च आतंकवादिएं दी मजूदगी बारे थ्होई दी पक्की सूह पर कारवाई करदे होई पुलस, फौज ते सीआरपीएफ दी इक सांझी टीम कारवाई करदे होई घेराबंदी करियै तपाशी अभियान चलाया। उआं सुरक्षाबलें दी एह सांझी टीम जिसलै संदिग्ध थाहर बक्खी बघा'रदी ही, तां उत्थें छप्पे दे आतंकवादिएं उंदे पर गोलीबारी शुरू करी दित्ती, जेह्दे मगरा टाकरा भखी गेआ। तोआई खीरी रिपोर्ट थ्होने तगर टाकरा जारी हा ते होर ब्यौरे गी अजें बलगेआ जा'रदा ऐ।



## Sri Lanka

श्रीलंका च होई दी बड़ी मती बरखा करी बड्डे पैमाने पर तबाई होई ऐ. जेह्दे च 15 लोक मारे गे न ते 5 ज्हार थमां मते लोक बेघर होई गे न। श्रीलंका दे आपदा प्रबंधन केन्द्र नै आखेआ जे राजधानी कोलंबो सनें 7 जिले प्रभावत होए न। 4 ज्हार थमां मते घरें गी आंशित तौर पर नुक्सान पुज्जा ऐ, जिसलै कि 28 घर पूरी चाल्ली तबाह् होई गे न। श्रीलंका सेना बचाह् कम्मं च लग्गी दी ऐ।



## Assam

असम च हाड दी स्थिति गंभीर बनील दी ऐ। 13 जिले दे 564 ग्रां च 5 लक्ख थमां मते लोक एहदी चपेट च न। हाड करी 8 जहार हेक्टेयर थमां मती जमीन पर लग्गी दी फसल गी नुक्सान पुज्जा ऐ। ब्रह्मपुत्र नदी च पानी दा स्तर गुवाहाटी, ग्वालपारा ते धुवरी च बधा'रदा ऐ। कोपिली, बरामक, धनसिरी, बुरहीदिहिंग, गौरोग ते कुशियारा नदिएं दा पानी बी केई थाहरें पर बड़ी गेआ ऐ। राज्य च पिछले 24एं घेंटे च 3 लोकें दी मौत कन्नै हाडें च मरने आलें दी गिनतरी 14 होई गई ऐ। हाडें कन्नै केई जहार लोक प्रभावत होए न।



## Telangana

तेलंगाना दे 10 ब'रें पूरे होने पर कल हैदराबाद दे टैंक बंड च शानदार समारोह दा सरिस्ता कीता गेआ। समारोह च राज्य दी सग्गोगार सांस्कृतिक विरासत, पारंपरिक कला, संगीत ते नाच दा प्रदर्शन कीता गेआ। कार्यक्रम च राज्यपाल सी.पी.राधाकृष्णन, मुख्यमंत्री ए.रेवत रेड्डी, राज्य सरकार दे कैबिनेट मंत्री, विधायक, मुख्य नेता ते मन्ने परमन्ने दे लोकें बक्ख-बक्ख सांस्कृतिक कार्यक्रमें च हिस्सा लैता।



## French Open

भारत दे रोहन बोपन्ना ते उंदे आस्ट्रेलियाई जोड़ीदार मैथ्यू एबडेन फ्रेंच ओपन टेनिस मर्दे दे डबल्स दे त्रिए दौर पर पुज्जी गे न। बोपन्ना ते एबडेन दी जोड़ी नै ब्राजील दे मार्सेलो जोर्मन ते ऑरलैंडो लूज गी 7-5, 4-6, 6-4 कन्नै हराया। भारतीय-आस्ट्रेलियाई टेनिस जोड़ी दा दुए दौर च अर्जेटीना दे सेबेस्ट्रान बाएज ते ब्राजील दे थियागो सेबोथ वाइल्ड कन्नै मकाबला हा पर उंदे प्रतिद्धंदी मकाबले थमां हटी गे। हुन ग्रैंड स्लैम दे त्रिए दौर च बोपन्ना ते एबडेन हुंदा सामना एन.श्री राम बालाजी ते मिगएल एंजेल रेयेस बेरेला मार्टिनेज दी जोड़ी कन्नै होग।



## ICC-Cricket

आईसीसी टी-20 क्रिकेट विश्व कप च कल रातीं वेस्ट इंडीज़ नै पापुआ न्यूगिनी गी 5 विकेटें कन्नै हराई दित्ता। गुयाना दे प्रोकवर्डेस स्टेडियम च पापुआ न्यू गिनी आस्सेआ दित्ते गेदे 137 रंजें दे लक्ष्य गी वेस्ट इंडीज़ नै 19 ओवरें च 5 विकेटां मुआइयै हासल करी लैता। वेस्ट इंडीज़ पास्सेआ रोस्टन चेज नै सब्बने शा मते बिजन आउट होए दे 42 रंज बनाए। चेज गी मैचे दा बेह्तररीन खडारी प्लेयर ऑफ द मैच घोषत कीता गेआ। पापुआ न्यू गिनी लेई असद वाला नै दो विकेटां लैतियां, जिल्ले के एली नोओ चाड सोपर ते जान कारिको नै 1-1 खडारी गी आउट कीता। आईसीसी टी-20 विश्व कप च अज्ज दऊं मैच खेड्डे जा'रदे न। बारबाडोस च नामिबिया दा मकाबला ओमान कन्नै जारी ऐ ते दुआ मैच रातीं 8 बजे थमां श्रीलंका ते दक्खन अफ्रीका बश्कार खेड्डेआ जाग। ओमान नै 19.4 ओवरें च 109 रंज बनाए न।

